



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

# MOELETSI OA BASOTHO

PARARE DOMINO PLEBEM PERFECTAM



**TK o itela ho Afrika Boroa**

3

**Hlana-phetho lekhethong**

7



## MATSATSI A 90 KE TORO



**Access Our Books on Akello Library!**

Explore a wide range of our books anytime, anywhere. Visit Akello Library today and start reading!

#ReadAnywhere #AkelloLibrary #ExploreMore



<https://library.akello.co/downloads>

**Follow the link**

**MOELETSI****Ngoan'a mahan'a joetsoa****Trauma vs traumatic experience**

Kamor'a ketelo ea Presidente ea Naha ea Afrika Boroa 'moho le matona Naheng ea Lesotho ho tla bua ka litaba tsa tšebeliso 'moho lipakeng tsa linaha tse na tse peli, 'Muso oa Lesotho ka Tona-Khoho o ile oa kopa Afrika Boroa ho fana ka tokollo ea motsamao ea matsatsi a 90, ho qala ka la 1 khoeling ea Motšeanong monongoaha. Maikutlo a Basotho ba bang ke hore kopo eo e joalo ha se ntho e tla etsahala hobane ha se lekhetlo la pele, Lesotho le teka taba e kang ena kapel'a Afrika Boroa. Ha ho mohla e ileng ea amohela le ka mohla, ka hona Lesotho ka boetapele le lokela ho etsa ntho e 'ngoe e bonahalang ho e-na le ho tpa-tapa 'nqa e le 'ngoe tjena.

Taba ea pele eo puso o ka beng o e buile ke hore Basotho ba tšeroeng Afrika Boroa ka bongata ba lokolle hang-hang, ebe ho rarolloa mathata a mang joaloka bao libukana tsa bona tsa ho eta li fanyehiloeng. Tsena ke lintlha tsa bohlokoa tse hlokanang ho rarolloa pele-pele e tle e re ho shebanoa le tse ling Basotho bano ba phelang ka tsitsipano ba be ba lokolohile. Ho feta moo ho ntse ho e-na le ba bang ba sa tšoarolang ba phelang joaloka linonyana. 'Muso o lokela ho shebisisa lintlha hantle ha o etsa liqeto tse mabapi le Basotho.

Moetapele oa Mpulule Political Summit o re 'Muso oa Lesotho o tl'o qetoa ke manganga a ho se mamele likeletso qha! ebe qetellong o sebelisa puso ea sechaba ka sechaba hampe ka ho tšehetsana ka lifoutu eaba ho lumellanoa ho nyolla lekhetho ka 0.5%. Ba hana keletso ea hore ho emeloe ho bona hore na Afrika Boroa e sebetsa litaba tsa eona joang e le ho qoba hona ho tla etsa ntho e le 'ngoe hangata tjena. Ka bomalimabe o tl'o lokela ho boela paramenteng ho il'o tšohla taba eo hobane ka boahelaneng ho sa nyolloa lekhetho ho hang. Taba ena e hlaha Lesotho hampe hobane e hlaha e ka ke lekhabunyane la Afrika Boroa.

Ka lehlakoreng le leng Kereke e Katholike e oele ka phatla ka lefu ea Ntate ea Halalelang Francis, ea hlokaletseng hoseng ka la 21 'Mesa monongoaha kamor'a ho kula likhoeli tse peli ke lefu la matšoafo. Leha ho le joalo o hlokaletse kamor'a ho shoa lehlakore, ho ilibana le bothata ba pelo. Bakriste le baetapele ba Kereke ba mo tlotlile ka makhabane a mangata, 'me Lesotho mona Kereke e tla mo hopola ka ho e fa Khosana ea pele, e leng mofu Mobishopo oa mehleng oa Tikoloho ea Mohale's Hoek Sebastian Koto Khoarai OMI. Rabalumeli o tla bolokoa ka la 26 St. Mary Major Basilica. Moea oa hae le ea balumeli bohle ba faletseng e phomole ka khotso mohaung oa Morena Molimo.

**MOLIMO A BOLOKE LESOTHO LE BASOTHO**

Many of us confuse traumatic experiences for trauma, when certain undesirable things happen to us we are of an opinion that we experience trauma. The reality of the matter is, yes we maybe going through a traumatic experience but not trauma. Trauma is not what happens to us but our reaction to what hap-

pens to us. Trauma is literally a disconnection of an individual with the self, we internalise so much our experiences to a point that it becomes difficult to separate an individual from their experiences. We allow ourselves to turn into our problem and our emotional maturity is not at a level where we can separate our-

selves from what happens to us. Trauma therefore, is what we allow to happen inside of us as result of what happened outside of us. We don't have control over traumatic experiences but we have control over our reaction to them, we can literally control trauma even though we can't control traumatic experiences.

**Mazenod BOOK CENTRE**  
22 322 213 / 27 350 562  
maserubookcentre@gmail.com / bookcentre@mazenodprinting.co.ls



**M195.00**



**A5 M152.00**  
**A4 M75.00**



**Mosali a Nkhola: M195.00**  
**Lesotho lea ea: M150.00**  
**Tholoana tsa Sethepu: M130.00**

**Libuka tsa sesotho**

**Contacts: +266 28350 466****62600983 WhatsApp****Email: [newsroom@moeletsiobasotho.co.ls](mailto:newsroom@moeletsiobasotho.co.ls)****Sales and Marketing: (+266) 28 350 466/ 57396597 (WhatsApp)****MOELETSI oa BASOTHO**

A LOKHETSE MORENA SECHABA SE PHETHEHLENG (LUKE 1,17)

**Editorial****Lesoetsa Rakubutu**

(+266) 6203 1949 / 58490670

EMAIL: editor@moeletsiobasotho.co.ls

**Mohale Lehlohonolo (Sub-editor)**

(+266) 58 771 507 / 62 771 507

**Journalists****Nthabeleng Seithleko**

57 665 038/ 68 216 271

**Tšeliso Thakholi**

58 540 853/ 63 480 404

**Production Desk: 'Mateele Liqa**

# TK o itela ho Afrika Boroa

## Nthabeleng Seithleko

**P**resident ea Afrika Boroa Cyril Ramaphosa, o bokile likhomo Ntlong ea Borena bo Boholo, pele a e ba le seabo 'mokeng oa matsatsi a mabeli oa Naha ea Lesotho le Afrika Boroa o reretsoeng ho ntlafatsa likamano tsa linaha tse, ka la 23 'Mesa monongoaha.

Tona-Kholo Samuel Ntsoakoane Matekane, o hlalositse hore 'moka ona o molemo kaha o ba thusa ho ithahloba tšebetsong ea bona e le linaha. A re ba ile ba kenya tšebetsong leano la tšebeliso 'moho malibohong ha nakoana, more-ro ke hore ho qeteliso leano leo hore ho batalatsoe mabala molemong oa mot-samoa o lokolohileng.

A re ba motlotlo hore kam-or'a 'moka oa pele o neng o tšoaretswe Pretoria ka sele-mo sa 2023, Basotho ba sebetsang Afrika Boroa ba ile ba etsetsoa litokomane, ka hoo a ipiletsa ho 'muso oa Afrika Boroa ho kenya

tšebetsong matsatsi a 90 ho tloha ka la 1 Motšeanong monongoaha.

Lebitsong la President ea Afrika Boroa Ronald Lamola, o hlalositse bohlokoa ba hore linaha tse na tse peli li lule li batalatso mabala ho bona hore tšebeliso 'moho lipakeng tsa tsona e ba ntlha e kholo, molemong oa khotso.

O re lefapha la habo le sebetsang malibohong le ntse le sebetsa kathata ho ntlafatsa litšebeliso sebakeng sa batho ba sebetsang kante ho linaha tsa habo bona hore bohle ba bolokehe. O re ba tsoere ka matla ho loantsa litlolo tsa molao malibohong e leng tse thunthetsang likamano tsa linaha tse na ka bobeli.

O supile ba sebetsa ka matla ho bona hore ba felisa litaba tsa batho ba hoebang merafong e seng e koetsoe, khoebisano ka batho, batho ba hoebang ka lithetefatsi le ho hlatsoa chelete. O re tšebeliso 'moho lipakeng tsa linaha tse na e ka tliša katleho le ntlafalo kholong ea moruo.

# Matsatsi a 90 ke toro feela



## Nthabeleng Seithleko

**M**othehi oa Mokhatlo oa Basebetsi ba sebetsang Libakeng tse o seng tsa habo bona, Lerato Nkhetšhe o re taba ea matsatsi a 90 ao 'Muso oa Lesotho o itelang ho Afrika Boroa ka ona, e ke ea chabeloa ke letsatsi hobane ha ho le ka mohla boetapele ba naha eo bo itlamang ka taba eo ha e se hore ba il'o imamella eona. O boletse tse na puisanong le Koranta ka la 24 'Mesa monongoaha.

O re ka makhetlo boetapele ba puso e litulong bo leka lipuisano ka mefuta-futa ebe boetapele ba naha ea Afrika Boroa bo itlama ho imamella taba ena, empa ho fihlela ha joale ha ho nko ho tsoa lemina. O re bothata bo boholo bo tjametseng naha ena ke babusi ba itjarang ka bo-bona litabeng tsa lipuisano, ba sa lumelleng litsebi tsa naha ea habo bona ho fetoha molomo oa naha hore moo ba hlolehileng ho kenelle Matona le Bangoli ba Baholo ba Linaha.

O re e bang Lesotho le ntse le sekisa meokho ha le etsa lipuisano le Afrika Boroa ha ho kamoo bao ba ka ba mamelang hobane litlhoko tsa bona ba ntse ba li fihlela. O re taba ea ho rekisa metsi a naha ena e lokela ho ba seikokotlelo le setšabelo sa babusi ha ba etsa litumellano eseng Basotho ba fetohle lisebelisoa ho se tharollo ea letho.

O supile hape hore ha ho kamoo mebuso ea linaha tse na e ka reng e hlahloba tšebetso ea eona ba sa re letho ka maikutlo a sechaba, ka hoo hona ke khatikelo ea Litokelo tsa Man-

tlha tsa Botho le tšitiso ea bolokolohi ba puo. O re seo ba se khotlaetsang ke hore ebe 'muso o hateletse Afrika Boroa hore ha ba tla lipuisanong ba be ba lokolotse Basotho ba tšeroeng Lindela, ba jeleng matsatsi le bao libukana tsa bona tsa aho eta li fanyehiloeng lilemo ba sa ee naheng eo li fanyolloe.

O re taba ena e ne e tla tšabisa Afrika Boroa ho tla ka liqeto tse molemong oa bona kaha Lesotho le ne le tla be le lomme bebebe. A re ba boetse ba lokela ho fana ka lipolomiti nako eohle eseng li fanoe ka nako le mangolo a tumello ho baithuti ba kenang sekolo Afrika Boroa

Tšolo Lebitsa o itse maliboho lipakeng tsa Lesotho le Afrika Boroa, a lokela ho nolofatsa tsela ea tšebetso, mokhoa oa ho tšela o be bobebe molemong oa baitšokuli ba isang thepa ea masela le meriana Afrika Boroa.

O re Basotho ba tšelele Afrika Boroa ka karete ea naha ea boitsebiso, e le ho qoba ho ja matsatsi, le taba ea baitšokuli ba hlaseloang tseleng e eang le ho khutla Gauteng ho ea reka thepa, e lokela ho sebetsoa hanghang, hape tšireletseho ea

Basotho litseleng le hore khoebo lipakeng tsa Lesotho le Afrika Boroa e se ke eaba boemong bo holimo feela, e theohele boemong bo tlasana.

Litaba tse na li latela hore Letona la tsa Machabeng, Mohlompehi Lejone Mpotjoane a hlalose hore mebuso e 'meli 'mokeng oa eona e entse litumellano tsa khaho ea matamo nokeng ea Mohokare ka morero oa noesetso, hape litaba tse amanang le Thuto ea Mathomo le Afrika Boroa e arolelanoe ka ho se siane, esitana le thuto ea Likolo tse Phahameng ka ho tšoana li se ke tsa ba thoko haholo.

Mafapha a boiketlo ba sechaba a ntšane se inong ho nolofalletsa malapa linaheng ka bobeli ho phe-la, khokahano ea khoebo le khoebisano le moruo o lekaneng naha e 'ngoe e se ke ea ba hole haholo. Hape litsebi tsa machaba li tle ho tla rala motsamoa oa baahi linaheng tse na.

Tse na li tla phethahala ka khoeli ea Loetse monongoaha, kaha tse boletsoeng li tla nka nako e telele empa e haufi ke hore Basotho ba tla fuoa matsatsi a 90 Afrika Boroa ho qala ka la 1 Motšeanong monongoaha.



Mazenod PRINTING WORKS Pty Ltd  
57396597  
28 350 815  
28 350 466  
lesaoanat@gmail.com

U se u ka fumana Lifela Tsa Bakriste ho marangrang a boletsoeng ka tlase.

Get the Akello app on Play Store, App Store, or Huawei App Gallery for Mazenod books and more. Download now!

akello  
<https://library.akello.co/downloads>



# MOELETSI O TŠEHETSA BACHA

**Tšeliso Thakholi**

**H**o ikopanya ka litsebo tse fapaneng tsa mesebetsi ea matsoho ke e meng ea mekhoea eo bacha ba ka e sebelisang ho holisa le ho matlafatsa litalenta tsa bona, esita le ho ithehela mesebetsi. Sena se ka boetse sa thusa bacha ho bapatsa likhoebo tsa bona le ho kena litlholisanong tsa khoebo le khoebisano le linaha tse ling. Taba ena e ka boela ea bopa bonngoe, lerato le ho sebetsa 'moho.

Re ile ra buisana le ba bang ba bacha ba ikopantseng ka litsebo tsa bona tse fapaneng tsa ho itl-hahisetsa mesebetsi ba phelang libakeng tse fapaneng tsa Setereke sa Maseru. Leha ba e-s'o rehe boikopanyo ba bona lebitso morero o moholo oa bona ke ho arolelana litsebo le ho thakelana ka malebela mesebetsing e fapaneng ea matsoho e kenyeletsang ho loha ka khoele le ho etsa likatiba tsa Sesotho ka joang 'me morero ke hore qetellong ba tle ba qetelle ba thehile khoebo e kholo e hlhisang mefuta e fapaneng ea lihlahisoa tse entsoeng ka matsoho.

Kahare ho boikopanyo ba bona ba na le bacha bao e leng litsebi tsa tsamaiso ea khoebo, poloko ea libuka, ba tsebang ho roka, ho loha, baboloki ba lichelete le lipapatso tsa likhoebo. Phala ea baikopanyi bana Thabiso Sello h'a lokolisa



tsa boikopanyo ba bona o li beha joana:

## **Ak'u qale pele ka ho re qoqela hore na u sebetsa'ng?**

Ka tšebetso ke moeletsi litabeng tsa khoebo, empa hajoale re bacha ba 12 ba ikopantseng ho bona hore litsebo tsa bana ba Basotho li ba tsoela molemo, ho arolelana litsebo tse fapaneng le ho thakelana ka malebela mafapheng a fapaneng a bophelo. Qetellong ke ho theha khoebo e kholo kapa koporasi e tlang ho re thusa tlhahisong ea mesebetsi, e le ho loantša leqeme le teng la mesebetsi kahare ho bacha.

## **Uena u sebetsa u le'ng kahare ho boikopanyo boo ba lona?**

Ke phala 'me ke boetse hape ke bapatsa boikopanyo bona ba rona,

marang-rang, likoranteng joaloka ea Moeletsi oa Basotho le Li-ea-le-moeeng e le ho kothaletsa bacha ho ikopanya metseng moo ba phelang teng ka litsebo tsa bona tse fapaneng ho ithehela mesebetsi. Empa re ba kothaletsa haholo ho theha mesebetsi e meholo e kang ea likoporasi kapa likhoebo tse kholo tse tla tseba ho fa palo e ngata haholo ea bacha mesebetsi.

## **Le qhololitsoe ke'ng ho theha boikopanyo boo?**

Re ile ra ithuta hore bacha ba bangata ba na le litsebo tseo ba ka iphelisang ka tsona, empa bothata bo boholo ke ho itšeka thajana ka ho sebetsa ka bonngoe. Ra bona hore sena ha se ba tsoele molemo ho hang hoo qetellong ba seng ba ntse ba nyolosa ba theosa ka lit-

sebo tseo ba nang le tsona, ho se letho leo ba le etsang. Ke ha re tla ipopa ho qala boikopanyo bona ba rona ka ho kopanya litsebo tse mesebetsi eo re e etsang.

## **Re bolelle lebitso la baikopanyo ba bacha le hore na ke litho tse kae?**

Re na le selemo feela re ikopantse hoba re qalile ngoahola ka khoeli ea Hlakola, 'me ha re e-s'o be le lebitso kaha re mothating oa ho tla ingolisa le Ofisi ea Molao. Hajoale re litho tse 12 e leng baroetsana ba tšeletseng le bahlankana ba tšeletseng.

## **Ke liqholotso life tseo le kopanang le tsona?**

Ho ntse ho e-na le bacha ba bangata ba nang le litsebo tseo ba ka tsebang ho iphelisa ha feela ba iko-

pantse ho sebetsa 'moho, empa ba ntse ba e-s'o utloisise bohlokoa ba boikopanyo hore bo ka tlisa phetoho e kholo bophelong ba bona. Ba bang ba re nyefola le ho re khella fatše. Athe ba bang bona re se re ile ra ba leleka e le ha re hlokometse hore ba tlisitse mafereho, litšebo le likhang tse sa re tsoeleng molemo. Ha re qala re ne re le 30 ra 'na ra ba fokotsa joalo ho fihlela re ba re sala re le 12. Bana ke litho tse nang le boikemisetso le kutloisiso ea seo re batlang ho se fihlela.

## **Likatlheho ke life?**

Re atlehile ho theha boikopanyo ba mofuta ona tikolohong ea Ha Moitšupeli moo bacha ba seng ba bile ba thehile mokhatlo oa temo ea meroho le ho loha likatiba tsa ulu. Re boetse re na le bacha ba bang hape ba ikopantseng ba Tšenola ba etsang lihlahisoa tsa limmete tse aloang fatše ka khoele.

## **Toro ea lona ke efe?**

Re lakatsa ho bona bacha ba naha ka bophara ba ikopantse ka litsebo tsa bona ho ithehela mesebetsi e meholo. Rona re batla ho theha khoebo e kholo ea lihlahisoa tse fapaneng e tlang ho ba ea pele ea bana ba Basotho kahar'a naha.

## **U rata ho re'ng ho bacha?**

Nka re ho bona ba eme ka maoto ba ikopanye kaha boikopanyo bo le bohlokoa haholo, ke ka bona feela ba ka tsebang ho iphelisa le ho phela. E kholo boikopanyo ke botšephehi, lerato le mamello e le hore ba tle ba tsebe ho fihlela seo ba se laba-labelang. Batsoali ba tšehetse bacha linthong tse ntle tseo ba li etsang ka ho ba ruta ka bohlokoa ba boikopanyo.



# Li fahlolla bahoebi

qapi ba bona e le hore ba tsebe ho eloa hloko habonolo machabeng.

## Nthabeleng Seitlheko

**E**le ho matlafat-sa polokeho le ts'ireletso ea boqapi ba bana ba Basotho le ho bona hore ba atleha ho hoeba habonolo machabeng ho se tšitiso ea letho, Lekala la Toka le Molao ka koproanelo le World Intellectual Property Organization (WIPO) li thakela bao ka malebela mabapi le ho ngolisa boqapi ba bona. Litaba tsena, li bile ka la 23 'Mesa Monongoaha.

Motlatsi oa Ramolao e Moholo, Adv. Makhele Sekati o supile hore 'moka ona o reretsoe ho ntlafatsa boqapi ba bana ba Basotho ho bona hore lintho tsohle tseo ba itlhaahisetsang tsona ka litsebo tsa bona li ea sireletseha, ka molao e le ho qoba har'a tse ling bosholu ba boqapi bo teng kahar'a naha.

O re sena se tla thusa haholo kholong ea moruo oa naha hobane bacha ba nang le boqapi ba tla etsa lintho ba se na letsoalo. A re bao ba tla thusoa ke ha feela ba fuoe koetliso ea boleng e matlafatsang kutloisiso ea bona le hore ba qetelle ba ngolisa boqapi ba bona.

O supile ha ofisi e sebetanang le litaba tsena lekaleng la habo e ike-miselitse ka hohle-hohle ho bona hore e tataisa batho bohle ho ngolisa boqapi ba bona ho qoba ts'enyeha e ka bang teng.

E mong oa bahoebi 'mokeng ona, Kamohelo Chabana ho hlaha Lei-



sa Clothing Lesotho, o hlalositse hore o hlahisa liaparo a sebelisa lihlahisoa tsa Naha ea Lesotho, ka hona boqapi ba hae bo lokela ho bolokeha hobane batho ba bang ba utsoa litsebo tseo ba ikahe ka tsona haholo ba nang le monyetla oa ho iqalla likhoebo ka lichelete tse ngata.

O re monyetla ona bacha ba lokela ho o nka hobane ba bang ba lutse le boqapi ba bona malapeng ba tšaba ho bo hlahisa kaha ba se na mokhoa oa ho qala khoebo empa ha ba bo ngolisitse ba tla lula ba una molemo ka bona.

A re ba leboha lekala ka ho ba fahlolla hobane ba ne ba hloka tsebo ka litaba tsena, ka hoo seo se tla ba thusa ho kena khoebong ba sa tšoha letho. O re ha ba ngolis-

itse boqapi ba bona kahar'a naha le machabeng ba tla nolofalloa ke ho hoebisana le batseteli ba baholo hobane boqapi ba bona bo tla be bo bolokehile.

Lerato Kobuoe ho hlaha khoebong ea Thousand Hills Bakery, o supile hore ho kena khoebong ha se feela ho etsa ka matsoho empa ho qapa ho ka phelisa motho bophelo bohle ba hae. O re ho bohlokoa hore bacha ba ngolise boqapi ba bona hore ba tsebe ho hlola liqholotso tsa tlhokahalo ea mesebetsi.

A re o thabile hore ebe ba fuoe koetliso ena hobane ba ne ba se na tsebo ka litaba tsa ho sireletsa boqapi ba bona le ho bona hore lintho tsohle li'a ngolisoa. A khothaletsa bahoebi bohle ho bona hore ba ngolisa bo-

# 'Muso o tsetele tlhahisong ea meriana



## Nthabeleng Seitlheko

Muso oa Lesotho o lokela ho ntlafatsa mekhoha oa botseteli litabeng tsa bophelo bo botle, ka ho tsetela boqaping ba bots'oaki ba litlama ho hlola qholotso ea mafu a aparetseng ea mafu a aparetseng naha. Litaba tsena li boletsoe ke setsebi sa botsoaki le ho tlotla lero la litlama, Thabo Seot-sanyana ho hlaha Setsing sa Med-iQ Nutra-ceuticals ka la 24 'Mesa Monongoaha.

'Muso o ka tsoa joang boimeng ba ho oka mafu a mangata ka litjeo tse boima? Ka ho se iphapanyetse litsebo tse teng kahar'a naha tsa bophekoli, o bone hore o tsetela litsebong tsa Basotho ho ntlafatsa litsebo tsa bona hore o imollohe ho sebelisa litsiane tse ngata ho okela Basotho mafu a ka phekoang kahar'a naha.

Ke ka litsela life seo se ka fihlelang? Ke ha 'muso o ka ntlafatsa melao 'me oa sireletsa tsebo tsa boqapi ba litlhare, tsa hlahlojoa moo ho nepahetseng tsa sebelisoa ho pheko Basotho. Bothata ke hore melao e bonahala e ananela litlhare tse tsoang kante ho naha ho feta tse teng e le tse ka thusang ho pheko Basotho.

Ke hobane'ng Basotho ba rekisa meriana ka bongata ebile e ka e meng ha e'a hlahlojoa, 'me hoo ho kotsi ha kae? Bothata bo bohlo ke hore ho hlokoa litsiane tse ngata ho hlahloba meriana, batho ba nang le litsebo ba qetella ba hlahisa meriana le libakeng tse sa hloekang e leng taba e seng hantle.

Ke ka tsela efe meriana eo le e hlahisitseng ka litsebo tsa lona e ka sebelisoang ho pheko Basotho? Meriana e joalo e lokela ho beoa ka litsing tsa litlhare Litsing tsa Bophelo, hore Mosotho

tsebi ba eona, empa e bo sebelise ho hlola mathata a bophelo a tjametseng sechaba kaha ha joale le machaba a bonahala a sebelisa litlhare tsa habo ona. E bang 'muso o ka tsetela mokhoeng ona, ho tla boela ho hlahisa mesebetsi le ho boloka bophelo.

Molula-Setulo oa Komiti ea Paramente ea Litaba tsa Polokeho ea Sechaba, Makhalanya Mokhothu, o hlalositse hore Naha ea Lesotho e ntse e saletse morao linthong tse ngata 'me se ka ba thusang ke ntlafalo ea melao ho hlaha Lekaleng la Bophelo.

Potsong ea hore na ke'ng e ka etsoang ho imolla 'muso litjeong tse boima tsa ho oka mafu a sa phekoeng le a mang? O itse 'muso o lokela ho sebeletsa ho ananela booki ba moetlo le ts'ebeliso ea litlama tse tlhotliloeng tsa naha ho oka mafu a mang. A re ha botsebi boo bo le teng naha e iphekola, seo se tla thusa hape hore e thusa linaha tse ling ka

ho li phekoela mafu.

O re botsebi ba naha ena bo bongata empa bothata e le melao, le batho ba matleng ba sa eleng hloko litsebo tsa batho ba bang. A re ke nako ea hore ba ts'oarane ka matsoho le ba amehang ho bona hore ba hlola mafu a fapakaneng.

A re joaloka moemeli oa naha kahar'a Mokhatlo oa Liparamente oa Bophelo, o sebetsa ka thata ho bona hore linaha li phamolela litaba tsa bophekoli ba moetlo holimo. A re ntho e 'ngoe e khole e lokelang ho etsoa ke tlhahlobo ea lijo tse kenang kahar'a naha hore Basotho ba je lijo tse hloekileng.

H'a phethela o itse ba ts'oere ka thata ho bona hore ho ba le litlhare tse fuoang bakuli tse fumanehang kahar'a naha, hobane mokhoa oo o tla matlafatsa naha le eona e tla tseba ho ithehela mesebetsi ka ho etsa meriana, hape ba hloka ho bona setsi se etsang litlhare se sebetsa kahar'a naha.



# Hlana-phetho lekhethong la 0.5%

## Nthabeleng Seitlheko

**M**oetapele oa Mokha oa Mpulule Political Summit, Edwin Sehlabaka o re ke ntho e soabisang ho bona 'muso o sa eletsehe 'me liqetong tseo o li fihlelang paramenteng e le tse soetsang batho ba bang ka lebaka la bongata ba lipalo. Litaba tsena o li boletse puisanong le Koranta ka la 24 'Mesa monongoaha.

O re litaba tsena o li bua tjena kamor'a ho hlokomela hore 'Muso oa Afrika Boroa o hlanohetse nyollo ea lekhetho la 0.5% eo oa Lesotho o ileng oa hana ho ts'oara lipere hanyenyane khahlanong le nyollo ea lona, hore ba emele ba Afrika Boroa ho qetela taba eo kaha ho ile ha e ba le ho hana ha baetapele ba naha eo.

O re joale Lesotho le tl'o bonts'a bokhabunyane le bofokoli ba lona ho naha eo ka lebaka la ho sa mamele boeletsi, boo ba ileng ba kopa Letona la Lichelete Dr. Rets'elisitsoe Matlanyane ho se fetisitse lekhetho leo, empa kaha ba ka pusong ba ba hlola ka lipalo ba fetisa taba eo.

O supile ha joale likola li le ka mahlong hobane ba lokela ho khutlela paramenteng ho hula taba e joalo, ka hoo a bonts'a ho le bohlokoa hore ba pusong ba itumelle ho eletseha ho qoba litaba tse ka ba soabisang khahlanong le babusi ba linaha tse ling.

Sehlabaka o re ketso ena ke sesupo sa ts'ebeliso e mpe ea puso ea sechaba ka sechaba moo ba pusong ba hapang le lintho tse ka tlisetsang naha litlamorao tse bosula le ho nyenyefatsa tsamaiso ea bona.

H'a tsoelapele o re taba e 'ngoe ke ea tlhokahalo ea meralo pusong e litulong kaha ho etsoa lintlafatso empa ho sa shejoe litlhoko tsa mantlha haholo tlhahiso ea mesebetsi e tla thusa ho theola litaba tsa litlolo tsa molao. O re sechaba se lapileng se qetella se hloka mamello le litabeng tseo se lokelang ho nka boikarabelo ho sona.

O itse ba bone ho le bohlokoa hore e bang Tona-Kholo Samuel Nt-



sokoane Matekane a ntse a hana ho ea paramenteng ho arabela lipotso tsa sechaba, ho qosa kaha e le tokelo ho arabela litlhoko tsa sechaba. Ba tla boela ba sebetšana le litaba tsa ho etsa lits'isinyo ho thusa 'muso ho

arabela litlhoko tsa sechaba.

A re bofutsana bo tla lula bo aparetse Basotho ka lebaka la baetapele ba ikhabang, ba etsang eka ba rata sechaba empa ho se joalo. O re ho bohlokoa hore

sechaba se ke se hlahliloe ka thuto e tla ba thusa ho utloisisa hore na ba lokela ho khetha ka tsela e joang, ho se khatello ea Litokelo tsa Mantlha tsa Botho.

O re ho bohlokoa hore 'Muso oa Lesotho o hla-

nohele nyollo ea lekhetho la 0.5% hobane moruo oa naha o tl'o putlama haholo ha lekhetho la Afrika Boroa le sa nyolloa. E bang ho sa be joalo Basotho ba tl'o ime-loa 'moho le khoebisano ea linaha.

## Tlhokahalo ea mesebetsi ke koluoa

### Nthabeleng Seitlheko

**B**acha ho hlahla Mekheng le Makhotleng a fapakaneng a Lipolotiki le Mekhatlong e Ike-metseng, ba nts'itse polelo moo ba ipiletsang ho 'muso ho phatlalatsa tlhokahalo ea mesebetsi e le qomatsi. Litaba tsena li tiisitsoe ke e mong oa Bacha shut down, Molise Rasello puisanong le Koranta ka la 24 'Mesa monongoaha.

O hlalositse hore ke nako ea hore bacha ba eme ka maoto, ba hlobole mebala ea lipolotiki ba itoanele kaha ho se motho ea ba natsang ka letho. A re boholo ba liqeto tse etsoang ke tsa batho ba ichebileng bo-bona, ba sa reng letho ka kholo le ntlafalo ea bacha naheng ena.

O itse ho nepahetse hore bacha ba thusoe litabeng tsa temo kahar'a morero oa lihala-hala o ba thusang ho ba le litsebo tsa ts'ebetso ba be ba hiroe ba sebetse eseng ba beoe moo ba sebetsang lilemo ho se mesebetsi ba fuoa litsiane tse fokolang.

Polelo ea bacha bana ea la 21 'Mesa monongoaha,

e re tlhokahalo ea mesebetsi ke koluoa, ka hoo ho bohlokoa hore mafapha ohle a bonahale a nkela litaba tsena hloohong ho sa natsoe boemo kapa boleng ba batho.

Molula-Setulo oa Bacha ba Kobo-Tata(ABC) Keketso Sehlopho, o supile hore ba loanela bacha bohle kaha ba lumela hore ha ba le ntsoe-leng ba tla utloaha-

la. O re ba hloka tlhokahalo ea mesebetsi e phatlalatsoe e le koluoa, e behoe e le ntlha e kaholimo-limo 'me e tle moo matona a tlang ho ikarabella hore na a thusitse bacha joang.

O re bacha ba lokela ho ts'oarana ka matsoho, 'me ba se qabangoe le ho itumelloa ho aroloa ke lipolotiki hobane ke bona bokamoso ba kajeno, ba lokela ho

bonts'a kholo le boiphilelo ba bona haholo litabeng tsa ho boloka khotso, kopano le bonngoe ba sechaba metseng.

Ho ea ka tlaleho ea khakanyo ea lichelete ea sele-mo sa 2025/2026, ke bon-yane 38.9% ea bacha ba nang le mangolo a thuto e phahameng le ba se nang litsebo ba se nang mesebetsi.

### Thapelo ea Basotho

**'Mopi, Hlahlamacholo, Ramaseli, Rammoloki Atla li maroba, Atla li marotholi a pula, Atla li tsoeu tsa Rammoloki, Li tsoeu ke ho bopa masea, Hobane bohle re 'mopo le mesebetsi oa matsoho a ona. Hlahlamacholo hlahla metsi o'a etse keleli ea sehla sa Mariha, Hobane ka keleli u nchafatsa lichaba teng, Lichaba li tsoang ho uena 'mopong, Li tlang ho boela ho uena meahong. Ba meolim-eololo, ba lumang lingope ho theleha. Nts'ang tsoeu le nehe 'Mopi le tle le bone ha 'Mopi o thaba, Hobane Baholo-Balimo bona ba thabela likhalapa. Ba re ho be ho soeu, ho be malola, Ho be helehele pele le morao. Ho iloe kae ke Bo-ntate-moholo le Bo-nkhono ho sa keng ho khutloa, Ho iloe ha sekoti ha se tlale. 'Maakane joo! Ka 'Mopi ra le bona.**

**'Mopi oa Ramosholu-shololo litsohali Bo-nkhono ke bana ba labalabela matlala. Matlala b'a bona ka'ng a anetse, b'a bona ka ho theha mekhanya liphatleng tsa bona. Malataliana-tsela ngoana Rae e moholo ke mang, pitsana ha e na khobe, le e 'ngoe ha e na khobe. Qhaqholla u re qiti! Moshanyan'a sankatana le kholumo-lumo. Ho iloe kae ke bo-Mmabana, ba ile masimong.**

**Ba siile masea ka liotloaneng. Liotloana tseo ha li hole li sireletse masea. Ka bona Bo-ntate-moholo le Bo-nkhono ba lutse ka shoalane mollong le litlohotloholoana tsa bona ba li etsetsa litso mo monate;**


**Bo-limo le Tselane ka ba ka utloa ha ba ba etsetsa lilothe tse monate; bo-mmenthele o hlotse baruti.**

Leseli! Khanya!



# MOB KIDD'S EDUTAINMENT

Puzzle MOB 93-45823




- Across**
- 3 Mor'a Molimo (4,6)
  - 6 'Mala oa nako ea Pentakonta. (8)
  - 10 Ka Lebitso la Ntate, le la Mora, le la ..... (4,1,10)
  - 13 Sakramente eo morero ea eona e leng ho tšoarela libe tse etsoang kamor'a hlatsuo, e tsosolosang kamano le Molimo ho ea ka Kereke e Katholike. (4)
  - 14 "Joale ha letsatsi la Pentakonta le fihla, bohle ba ne ba bokane sebakeng se le seng.... 'me bohle ba tlala Moea o Halalelang, ba qala ho bua ka..... a fapakaneng, joaloka ha Moea o ba nehile hore ba bue." (Liketso 2:1-4)(6)
  - 15 Nako ea ketekelo ea ho theoha ha Moea o Halalelang holim'a baapostola. (10)
  - 17 Moea o Halalelang o re fa lineho tse supileng: Bohlale, butloisiso, keletso, tse bo,....., le ho tšaba Morena. Lineho tsena li re matlafatsa bophelong ba tumelo.(8)
  - 18 Nako e Halalelang ho Bakriste ketekelong ea Tsoalo ea Morena Jesu Kriste. (10)
  - 11 Ntate, ke ..... Moea oa ka matsohong a hau. (6)
  - 12 Mebala ea liaparo tsa baprista nakong ea Advente(9)
  - 16 Nako e Halalelang haholo ho Bakriste, moo ba hopolang le ho keteka tsoho ea Morena Jesu Kriste. (6)

- Down**
- 1 Jesu o ile a tsoha kamor'a matsatsi a ..... (6)
  - 2 Matsatsi a 40 pele ho Paseka, nako ea ho baka, ho itima lijo, le thapelo. (5)
  - 4 Moea o Halalelang oa theoha joaloka Leeba. (Ke ha Jesu a ne a...) (8)
  - 5 Lentsoe la botšelela la Jesu Sefapanong. (10)
  - 7 Jesu o ile a shoa ka letsatsi lefe? (9)
  - 8 Sontaha sa.... ke qalo ea beke e Halalelang ho Bakriste, e tšoaeng letsatsi leo Jesu Kriste a keneng Jerusalema ka lona. (6)
  - 9 "Lula le ....., hobane ha le tsebe letsatsi kapa nako eo Mor'a Motho a tlang ka eona." (Mareka 13:33)(10)

## SOLUTION

MOB 93-4582





# TSA KEREKE


## Mopapa Francis o'a bolokoa

### Tseliso Thakholi

**H**loho ea Kereke e Katholike lefatše ka bophara, Mopapa Francis ea ileng a timela ka 'Mantaha oa Paseka kamor'a boku- lo ba likhoeli tse peli a khatatsoa ke lefu la serame sa matšoafu, hoo hamorao a ileng a shoa lehlakore metsotsong ea ho qetela ea bophelo ba hae, o tlii'o phomotsoa borokong ba hae ba ho qetela Basilica of St. Mary Major, Vatican ka Moqebelo oa la 26 'Mesa monongoaha a le lilemo li 88.

Ho ea ka Moarekabishopo oa Kereke e Katholike Lesotho, Mobabatshehi Tlali Gerard Lerotholi OMI har'a liemahale tseo Mopapa Francis a tlang ho hopoloa ka tsona, tseo a li sietseng Kereke e Katholike 'moho le sechaba sohle sa Morena Molimo lefatšeng ka bophara ke liketso tsa bonatla, boetapele, lingoloa le lipolelo tse matla tseo a ileng a li bua ka molomo.

A re liketso tseo a tlang ho hopoloa ka tsona kahare ho Kereke ke hore o ile a ba le leano la thopho-bocha kahare ho Kereke malebana le litaba sa boitšoaro ba baprista, le tšebeliso ea lichelete tsa Kereke. A re o ile a boela a bitsa liphuthetho tsa bapishopo tse bitsoang li-synod



ngola tokomane ea tlhokomelo ea tikoloho le mekhoabo.

A qetella ka hore Naheng ea Lesotho o tla hopoloa ka ho thonya le ho hlomamisa Mobishopo Sebastian Khoarai OMI, eo e neng e le Mobishopo oa Tikoloho ea Mohale's Hoek ho ba Khosana ea Kereke ka la 19 Pulungoana 2016.

Mopapa Francis eo ho ea ka moetlo oa Kereke e Katholike a neng a bitsoa Rabalumele, ke letsoalloa la Naha ea Argentina Tikolohong ea Latin Amerika. O ne a hlahe ka la 17 Tšitoe 1936, 'me ma-

1.2 billione. E bile setho sa Kopano ea Ma-Jesuit, 'me kamora lithuto tsa hae, o ne a hloesetsoe Bopristeng bo Halalelang ka la 13 Tšitoe 1969.

Ho tloha moo o ile a etsoa Mobishopo ka la 27 Phupjane 1992, 'me ka la 21 Hlakola 2001 a hloesetsoa mokhahlelong oa hoba Khosana ea Kereke. Ka la 19 Tihakubele 2013 a hlomamisoa e le Mopapa e mocha, 'me a khetha lebitso la Francis ea Halalelang oa Assisi e le la hae la Mopapa ka sepheo sa ho mo tlotla. O hlahlama Mo-



tse hlano, tseo har'a tsona e 'ngoe e ne e le moo ho neng ho bua ka taba ea bohlokoa ba lelapa matsatsing a kajeno le ho ba le e 'ngoe e neng e bua ka litaba tsa mohau. A

bitso a hae a tsoalo ke Jorge Mario Bergoglio. Ke Mopapa oa bo-266 oa Kereke e Katholike lefatšeng ea ileng a etella pele Makatholike a hakenyetsoang kaholimo ho

papa Benedict XVI ea neng a itokolle ka la 28 Hlakola 2013. Moea oa hae le meea eohle e faletseng e ke e phomole ka khotso mohaug oa Molimo!

### 2024-2025 SELEMO C

#### SONTAHA 2 SA PASEKA

Liketso 5:12-16

Pesalema 117

Tšenolo 1:9-11.12-13.17-19

Joannes 20:19-31



### Khothatso

## Kriste ke Morena oa bohle

Sontaha se fetileng re ketekile Tsoho ea Morena Jesu, 'me ho sena re hopotsoa lintho tse ileng tsa etsahala kamor'a tsoho ea hae.

Karolo ea pele ea Evangeli ho hlalosa hore Kriste o ithahisitse ho barutuo ba hae ka letsatsi la pele le qalang beke, eleng Sontaha. Sena se etsahetse mantsiboeeng a letsatsi le tsoanang le leo Kriste a tsohileng ka lona. Ho bohlokoa ho utloisisa hore na lietsahala tsena li etsahetse ka letsatsi lefe le beke, e le hore re tsebe hantle hore na hobane'ng letsatsi la Sabatha le ile la fetoleloa ho la Sontaha.

Mantsiboeeng a letsatsi leo ka lebaka la ho tšaba babusi, barutuo ba ne ba ikoaletse ka tlang, 'me Morena Jesu a iponahatsa ho bona. Ho ea ka Evangeli ea Luka, pele ba ne ba maketse ba bile ba tšohile ka khopolo ea hore ba bona sethotsela. (Luka 24:37) Taba ea hore Kriste o kene mamati a koetsoe, e re hopotsa mantsoe a Paulosi Lengolong la Pele ho Ba-Korinte, "Ho jaloa nama, ebe ho tsooa 'mele oa moea. Haeba ho na le nama ho na le 'mele oa moea." (1 Ba-Korinte 15:44) Mona re hlokomela hore 'mele oa moea ha o phele ho latela melao ea tloaelo, hobane o ka hlaha oa nyamela ka nako eo o batlang.

Kriste o re, "Khotso e be le lona." 'me o ba bontša matsoho le lehlakore la hae. Mantsoe ana a bohlokoa haholo hobane ke bopaki bo hlahang Evangeling ea Joannes hore Kriste o na khokhothetsoe sefapanong e se ho fasoja joalokaha e ne e le moetlo mehlang eo. Ha barutuo ba se ba hlokometse hore ke Kriste ba ile ba thaba haholo, eaba ba balelloa har'a lipaki tsa tsoho ea hae.

Jesu o boela a re ho bona, "Khotso e be le lona. Joalokaha Ntate a nthomile, le 'na ke le roma." (Joannes 20:21) Ka mantsoe ana, Morena o ile a qala Kereke ka barutuo ho qala mosebetsi oa pholoho o phethahalitsoeng ka Kriste. Taelo ena e boela e re hopotse mantsoe a Kriste h'a ntsa a le lefatšeng, "Joalokaha o (Ntate) nthometse lefatšeng, le 'na ke ba roma joalo." (Joannes 17:18)

Kriste o ile a ba hemela 'me a re ho bona, "Amohelang Moea o Halalelang. Bao le tla ba tšoarella libe ba tla li tšoarella, bao le se nang ho ba tšoarella ha ba na ho tšoarella." (Joannes 20:22-3) Tšepiso ea Moemeli ea phethahala mantsoeng ana; ho romeloa ha Moea o Halalelang. (Joannes 3:8, 7:39, 15:26, 16:7) Sakramente ea Pako hoa pakahatsa hore e thehiloe ke Morena Jesu ka sebele. (Matheus 16:19, 18:18; Luka 24:47)

E mong le e mong oa rona a ke hlahlobe hore na karolo ea hae ke efe kahar'a Kereke ea Kriste; o etsa'ng hore e hole? Ebe motho ka mong o etsa boitlamo ba hore na o tla etsa'ng ho holisa Kereke selemong se tlang. Ba bang ba ka khetha ho ruta bana, ha bang bona ba ka khetha ho tataisa bakatekumena. Uena mohlomong le ba bang le ka sebelisa marang-rang ho ruta thuto ea Kereke. Liketso tsena kaofela li lokeloa ke grasía ea Morena hobane li molemong oa bohle.

Grasia ea Morena Molimo e be ho lona kaofela, tataiso ea Moea o Halalelang e le etelle pele ho phela pitso ea lona ka tsela e tla holisa Kereke. Etsang mosebetsi ea boapostola, e leng ea lerato ho bana ba habo lona. Ratanang 'me le phele ka khotso har'a lona.

### Bahalaleli har'a Beke

- 28 'Mesa Pollio
- 29 'Mesa Ava
- 30 'Mesa Aimo
- 1 'Mesa Grata
- 2 Motšeanong Zoe
- 3 Motšeanong Irene



# CFL e tšoara litlholisano

## Tšelisothakholi

Mokhatlo oa Lesotho oa Papali ea Chess (CFL) o ile oa tšoara litlholisano tsa bana ba lilemo li 10 ho isa ho tse 18 tsa Mohope oa National Youth Chess Championship, e le e meng ea mekhoha ea ho akofisa khoho ea papali ea Chess le ho tseba libapali tse hloahloa ho ipapisitsoe le lilemo tsa tsona ka ho fapakana.

Lipapali li ne li tšoaretswe Lancer's Inn, Maseru ka la 19 ho isa la 20 'Mesa moo teng mokhahlelong oa ba lilemo li 10 Lesedi Letebele ka ho bashanyana a ileng a ikhapela boemo ba pele, bobeling ea e ba Nepo Fanyane ha borarong e bile Bongani Maloi. Haele ka ho banana mohloli e bile Teboho Selia, maemong a bobeli ea e ba Kananelo Makhotho ha borarong e bile Renehi-loe Phoofole.

Hona baneng ba ntseng ba thuthuha, mokhahlelong



oa ba lilemo li 12 ka ho bashanyana Fako Letsie o ile a ikhapela tlhoho, bobeling ea eba James Kokami ha borarong e bile Bongani

Mokoma. Athe ka ho banana mohloli e bile Hlengiwe Phera, bobeling ke Nthabiseng Mothunyane, borarong ea e ba Karabo

Lefuma.

Mokhahlelong oa ba lilemo li 16 ka ho bashanyana Lintša Kamohelo e bile eena ea ipabotseng ha ka

ho banana Lineo Kokome le Boitumelo Mokhetsi ba hlile ba itsamaela bolacha ka ho hlaha maemong a pele le a bobeli ka tatellano. Mokhahlelong oa ho qetela oa ba lilemo li 18 Mohale Mokhamelile le Bonolo Ntsielo ba hlile ba bontša boiphihlelo le talenta ea papali ea Chess ka ho ithoma maemong a pele. Bahlohi mokhahlelong ka 'ngoe ba ile ba putsoa ka mehope, khau ea Khauta, Silifera le Bronze motho ka mong.

Ho ea ka e mong oa bahlophisi Monghali Tlhoriso Morienyane o re melemo ea papali ea Chess e mengata haholo, "ntle le hore ke papali re leka ho qobisa bana lintho tse ka ba khelosang, 'me tsa silafatsa bophelo ba bona. E ba hleka literateng ho ba haholo linakong tse tsa phomolo ea Paseka." A re Chess e boetse e ba thusa hore ka sekolong tsela eo ba bang le mamello ka teng e etsa hore e fapakane le tsela eo motho a sa bapaleng Chess a nahanang ka eona. A ipiletsa ho batsoali ho tšehetsa bana ba bona kamehla ha ba e tla lipapaling kaha sena se fana ka morolo le matla ho bona e le botsamaisi le ho bana.

# Moloi ke 'Mabotle

kenela litlholisano tse kang tsena ka makhetho a mangata haholo. Moloi o ile a

Tlokotsi Ndlovu o qalile pele ka ho leboha baroetsana ba neng ba kenetse litlholisano tsena, a leboha batšehetsi ba ileng ba atlehisa mokete ona le sechaba sohle se bileng teng. A re lena e ne e le lekhetlo la pele ba tšoara litlholisano tsa mofuta ona, 'me morero ke hore e se e tla ba tsa selemo le selemo.

A tiisa hore isao o tlii'o sebetsa ka thata hore mokete ona o atlehe ho feta mona. A khothatsa le ho phumula mekheo ba hlotsoeng hore lehlohonolo ha se lebelo, 'me ba tle ba leke hape selemong se tlang. A kopa bahoebi le batho bohle ba boithatelo bo botle ho etsa letsoho la monna kaha morero o moholo e le ho hollisa le ho matlafatsa litalenta tsa bana ba Basotho.

Puisanong le mohloli Selloane Moloi ea neng a tletse thabo e khoho pelong ea hae kamor'a ho ipabola hara baroetsana bana ba robeli, o itse tsena tsohle ha se ka bohlale ba hae, empa ke ka matla a Morena Molimo. Ka hona o leboha Morena Molimo pele le bohle ba ileng ba mo tšehetsa ho fihlela mona. A khothatsa ba hlotsoeng hore le bona ba tiise le ho itokisa hantle isao. "Sena se etsahetseng ho 'na e ka re ke toro ke ne ke sa khloe ha ke utloa hore ke 'na mohloli. Ke leboha ka ho khetholoha MSA ka ho re fa monyetla ona oa ho hlalisa litalenta tsa rona." Ke Moloi eo.



## Tšelisothakholi

Selloane Moloi o ipabotse ka botle le ka ho tebuka ka makhetho a hlolang, e le ho bontša boiphihlelo ba hae, litlholisanong tsa bo-mmabotle tsa Masianokeng Sports Academy Beauty Pageant (MSA), tse neng

li tšoaretswe holong ea El Legado, Masianokeng ka Moqebelo oa la 19 'Mesa monongoaha moo a ileng a tlotloa ka ho fuoa mohope joaloka mohloli.

Moloi ea lilemo li 20 o bonahetse e le eena ea khahlileng baahloli, e seng feela ka motsamao o motle le ka botle bo mahlong, empa le

ka bohlale bo bonahetseng ha araba lipotso. O bontšitse sebete, boitšepo le boqhetseke h'a botsoa lipotso ho tloha mokhahlelong oa pele.

Moroetsana enoa o ne a qothisana lehlokoa le baroetsana ba bang ba robeli ba nang le litsebo tse ngata tsa papali ena, ba kileng ba

lateloa ke Neo Motjeke ea hlahileng boemong ba bobeli e le First Princess, ha boemong ba boraro e bile Lineo Ntoane e le Second Princess.

H'a bua moketeng ona mothehi e bile e le mokoetlisi oa Setsi sa Koetliso ea Bolo ea Maoto sa Masianokeng Sports Academy, Monghali

# Lishoeshoe li itokisetsa COSAFA

## Tšeliso Thakholi

**S**ehlopha sa Naha sa Papali ea Bolo ea Maoto ea Baroetsana ba lilemo li katlase ho 17 sa Lishoeshoe se kene kampong, ho itokisetsa Lipapali tsa Linaha tsa Tikoloho e ka Boroa ho Afrika (COSAFA) tse tliil'o tšoarelola Motse-Moholo Windhoek, Namibia ka la 10 ho isa la 17 Motšeanong 2025.

Lishoeshoe e kene kampong ka Laboraro la Paseka, 'me Mokoetlisi Tjamela Tjamela o qalile ka libapali tse ka bang 25 ka palo tekong ea ho fihlela lenane la mapomela. Ha nako e ntse e atamela o tla fokotsa lenane leo la libapali ho ea ho 20, e leng lona lenane leo a tlang ho le phatlalatsa e le la mapomelo le tlang ho emela Naha ea Lesotho lipapaling tsena.

Sehlopha sa Naha se Lishoeshoe se Mokhahlelong oa C moo se pannoeng le Botswana le Zimbabwe. Ngoahola Lishoeshoe e ile ea bapala hantle mekhahlelong eo e qalang ea litholisano tsa COSAFA,



empa ea tlontlolloa le ho hobosoa ke Zambia ka ho e hlohlora ke thupa ea 15-0 papaling ea makhao-la-khang. Ke hona papaling ena khalala ea bolo ea maoto ea Zambia, e leng Mercy Chipasula a neng a iketsete nalane ka ho fuoa khau ea Gold Ball kamora ho hlaba Lishoeshoe lintlha tse 13 a le mong. Lishoeshoe e

boetse e bapala le Zimbabwe eo e seng e tloaetse ho iketsetsa borata ka eona.

Bompoli ba sireletsang sekola le ho hapa Mohope ona makhetlo a mabeli e leng Zambia ba Mokhahlelong oa B ba kopantsoe le Mozambique le Mauritius e seng e kile ea hapa mohope ona ka selemo sa 2019, 'me ngoahola ba ne ba o bapa-

la lekhetlo la bobeli kaha ka selemo sa 2020 o sa ka oa bapaloe ka lebaka la seoa sa lefu la COVID-19.

Mokhahlelo oa boraro ke oa A o bopiloeng ka Namibia, Malawi le Comoros e seng e bapetse mohope ona ka makhetlo a mahano. Athe Malawi e qalile ho bapala COSAFA U17 ka selemo sa 2022, 'me ea hla-

ha boemong ba boraro. Ha ngoahola e ileng ea hlatsoa jesi mokhahlelong oa pele moo lihlopha li neng li bapalana.

Basotho ba bangata ba na le tšepo e tiileng ea hore sehlopha sena se tliil'o tlosa sekhobo sa ngoahola mo se neng se hloloe papaling ea ho qetela ea mokhahlela-khang.

## Li tseka ho kena Premier



## Tšeliso Thakholi

**L**e hoja ho setse papali e le 'ngoe pele lihlopha tsa Mokhahelo oa A Division li phethela lipapali tsa tsona, ho bonahala ho sa le lerotho Liking e ka Boroa hore na sehlopha se tla fetela ho Premier ke sefe lipakeng tsa Members le Qoaling Highlanders, ha ka Leboea Maroala e se e ntse e kene kahar'a Premier League, empa e saletsoe feela ke ho tla bapala papali ea eona ea ho qetela le Kick4Life e tliil'o

bapalloa Maqhaka, Berea ka Moqebelo oa la 26 'Mesa 2025.

Ka Liking e ka Boroa ea A Division Members e ka holimo lokong ka lintlha-kholo tse 33, ha bobeling e le Qoaling Highlanders ka lintlha-kholo tse 32, borarong ke Quthing LMPS e nang le lintlha-kholo tse 31. Lihlopha tsena tse tharo li petetsane habohloko ho tseka ho ba kahare ho lihlopha tse kholo. Athe Swallows e nyolohetse maemong a bone ka lintlha-kholo tse 28, ha Liponono e theohetse ho a bohlanano ka lintlha-kholo tse 27, 'me bobeli li tseka boemo ba bone.

Athe ka Leboea ntoa e felile kaha Maroala e le eona e tliil'o kena ho Premier

League ka ho bokella lintlha-kholo tse 40 ka mokotleng, bobeling ke Kick4Life ka lintlha-kholo tse 29, borarong ke Litšilo ka lintlha-kholo tse 28. Haele ka Leboea lihlopha tse tlokotsing e kholo ea ho tla rathoa ke selepe ke Lilemela e boemong ba borobong le Lerotholi boemong ba leshome.

Ka Boroa teng lihlopha tse tsietsing ea ho tla iphumana li theohetse liking e ka tlase ea B Division ke Qacha'a Nek LMPS e boemong ba borobong le Naughty Boys e maemong a ho qetela lokong. Se makalitseng batho ba bangata ke hore lihlopha tsena tse 'ne, tse hlahileng boemong ba borobong li na le lintlha-kholo tse 14 ha tsa ho qetela li e-na le lintlha-kholo tse 12.

Puisanong le Phala ea A Division, Kofa Rantai o supile hore mafelong ana a beke lihlopha tsohle tsa A Division li tla be li qetela lipapali tsa tsona. A re hang kamor'a hore bahloli ba phatlalatsoe ka molao Liking tse peli, ba tliil'o etsa lotho ea Nedbank Cup.

"Leha ho le joalo re fihletse katleho e kholo lipapaling tsa rona selemong sena sa lipapali kaha boholo ba tsona li bapetsoe ho isa pheletsong ho sa ka ha eba le meferefere." O boletse joalo a bile a phethela ka hore lipapali tsa monongoaha e bile tse monate ka ho fetisisa kaha ho bile le boitšoaro bo botle. A tiisa hore se tla khahla bafani ho tsetela lichelete tsa bona ho A Division.

